

इवनिंग डोगरी न्यूज़ बुलेटिन

समे .18:15 Hrs

Headlines

- चुनांस आयोग नै राज्यसभा च खाली पेदिएं जम्मू-कश्मीर दी 4 सीटें लेई चुनांस कार्यक्रम दी घोशणा करी दिती ऐ-एहदे मद्देनजर 24 अक्टूबर गी वोट पाए जाडन।
- मुखमंत्रि उमर अब्दुल्ला होरें नमें सिरेआ हद्दबंदी ते चुनांस दे मगरा जम्मू-कश्मीर गी परतियै राज्य दा दर्जा देने दे खीरी चरण गी मुकम्मल करने पर जोर पाया ऐ।
- मुखमंत्रि उमर अब्दुल्ला होरें जम्मू-कश्मीर च भूचाल प्रतिरोधक क्षमता ते आपदा तैयारियें गी बधाने बारै माहिरें कन्नै तफसीली चर्चा कीती।
- समाज कल्याण मंत्री सकीना इतू होरें जम्मू-कश्मीर च सार्वजनिक सेवा ते विकास कम्में दे विस्तार लेई सरकार दी बचनबद्धता गी इक बारी परतिये पक्का कीता ऐ।
- एशिया कप क्रिकेट च अज्ज दुबई क्रिकेट स्टेडियम च भारत ते बांगलादेश बश्कार मुकाबला होग।

<><><><><><>

ECI-R.S Polls

भारती चुनांस आयोग नै राज्यसभा च जम्मू-कश्मीर दिएं खाली पेदिएं 4 सीटें लेई कार्यक्रम जारी करी दिता ऐ। एह सीटां फरवरी 2021 थमां जम्मू-कश्मीर च विधानसभा नेई होने कारण खाली पेदियां न ते हून कीजे इत्थे विधानसभा बनी गेदी ऐ तां एहदे लेई चुनांस कराया जाहग। चुनांस आयोग आसेआ जारी कार्यक्रम मुजब चुनांस लेई अधिसूचना 6 अक्टूबर 2025 गी जारी कीती जाहग। नामांकन दाखल करने दी खीरी तरीक 13 अक्टूबर होग जिसलै जे 14 तरीक गी दाखल

नामजदगिएं दे कागजें-पत्रें दी जांच कीती जाहगं मेदवार जेकर चाहन तां 16 अक्तूबर तगर नामांकन वापस लेई सकडन जिसले जे मतदान 24 अक्तूबर गी बड्डलै 9 बजे कोला लेइयै शामी 4 बजे तगर होग ते वोटें दी गिनतरी बी उस्सै रोज कीती जाहग ते एह पूरी प्रक्रिया 28 अक्तूबर गी तोड़ चढ़ी जाहग।

<><><><><><>

CM-Statehood

मुख्यमंत्री उमर अब्दुल्ला होरें केंद्र शासित प्रदेश जम्मू-कश्मीर दा राज्य दा दर्जा परतिये बहाल करने दी जरूरत पर बल दिता ते इसी खिते दी सब्बने शा बड्डी चुनौती दस्सेआ। पत्रकारें गी संबोधत करदे होई मुख्यमंत्री होरें आखेआ जे लोकें पूरी सक्रियता कन्नै लोकतांत्रिक प्रक्रिया च हिस्सा लैता हा ते हुन ओह मेद करा'रदे न जे जेड़े वादे उन्दे कन्नै उस दरान कीते गे हे, ओह हून पूरे कीते जान। उनें केंद्र आसेआ घोषत त्र'ऊं गेड़ें आहले रोडमैप हद्दबंदी, चुनांस ते फही राज्य दा दर्जा बहाल करने गी चेता कीता ते गलाया जे इन्दे द'ऊं चरणें उप्पर कम्म मुकम्मल करी लैता गेदा ऐ। मुख्यमंत्री होरें आखेआ जे हून लोक खीरी गेड़ दे मुकम्मल होने ते राज्य दा दर्जा परतिये बहाल होने दा इंतजार करा'रदे न। मीडिया कन्नै गल्ल करदे होई उनें आखेआ।

<><><><><><>

CM-Disaster

मुख्यमंत्री उमर अब्दुल्ला होरें आपदा प्रबंधन दे माहिरें कन्नै खिते च भूचाल थमां बचास लेई कीती जा'रदियें तैयारियें बारै तफसीली चर्चा कीती। एन.डी.एम.ए दे साबका मिम्बर ते भू-विज्ञान मंत्रालय दे साबका सैकरेटरी प्रो. हरिश के. गुप्ता ते IUST दे वाइस चांसलर प्रो. शकील अहमद

रामशू होरें मुखमंत्री उमर अब्दुल्ला हुंदे कन्नै मलाट कीती ते जम्मू-कश्मीर च आपदा प्रबंधन दियें तैयारियें ते सुरक्षा हीलें च बाददा करने बारें तफसीली चर्चा कीती।

<><><><><><>

Seva-Parv

देश दे बक्ख-बक्ख हिस्सें च मनाए जा' रदे सेवा पर्व पहलकदमी तैहत अज्ज अस कुल संसारी आडियो विजुअल एंटरटेनमेंट सम्मेलन वेक्स दे जरिये भारत गी मीडिया ते मनोरंजन दा वैश्विक केंद्र बनाने दे मोदी सरकार दे यत्नें उप्पर लोऽ पाने आं जेहदा आयोजन मुम्बई च 1 शा 4 मई दरान कीता गेआ हा। वेक्स नै सब्बने क्रिएटरें, स्टार्टअप्स ते वैश्विक उद्योग जगत दे लीडरें गी इक मंच प्रदान कीता। इस कार्यक्रम दे उद्घाटन दरान प्रधानमंत्री नरेंद्र मोदी होरें भारत दी रचनात्मक अर्थ बवस्था च जीडीपी गी बढ़ावा देने दी क्षमता उप्पर जोर दिता ते विकास दे इंजन दे रूप च विषय-वस्तु, रचनात्मकता ते सांस्कृतिक उप्पर सरकार दे केंद्र बिंदू बारें ध्यान केंद्रित कीता।

<><><><><><>

Seva-Parv Rajouri

‘सेवा पर्व 2025’ दे इक हिस्से दे तौरा पर राजौरी जिले दे सब्बने 6एं ब्लॉकें च “स्वस्थ जारी सशक्त परिवार” विषेसार कन्नै सेहत मैहकमे आसेआ 15 मेडिकल कैंप लोआए गए। इनें कैंपें च बक्ख-बक्ख बमारिएं दे माहिरें आसेआ महिलाएं दी सेहत जांच ते बक्ख-बक्ख चाल्ती दिएं बमारिएं, उंदे खतरे, उंदे इलाज ते उंदे कोला बचाऽ बारें जानकारी दिती जिंदे च महिलाएं दी रोजमर्रा दे जीवने च सेहत दिक्खभाल, गर्भावस्था दरान दिक्खलाल, कैंसर दी जांच, मानसिक स्वास्थ्य, निजी

स्वच्छता ते इस चाल्ली दियां होर दुइयां तकलीफां जा रोग जिंदा खतरा महिलाएं पर बने दा रौहंदा ऐ।

<><><><><><>

Itoo-Healthcare

समाज कल्याण मंत्री सकीना इतू होरें लोक सेवा दे दायरे गी बधाने ते सब्बने लोकें तगर विकास पजाने दी सरकार दी बचनबद्धता गी इक बारी परतिये पक्का कीता ऐ। कुलगाम दे अरवानी गांs च इक स्वास्थ्य भवन दा उद्घाटन करने दरान उनें गलाया जे इस नमी सुविधा राएं मरीजें दी दिक्खभाल च होर मदाद मिलोग। सेहत मंत्री होरें खिते च नमें अस्पताल खोलने, एम.आर.आई ते कैथ लैब दी सुविधा कन्ने सरकार दा लोकें तगर बेहतर सेहत सुविधा पजाने दे चला'रदे यत्नें बारें चर्चा कीती। उनें कश्मीर दी अर्थबवस्था च बागवानी खेतर दे महत्वपूर्ण योगदान बारें बी चर्चा कीती ते गलाया।

<><><><><><>

GST-Food

नमे जीएसटी सुधारें तैहत सरकारें खाने-पीने दे इस्तेमाल आहिलें चीजें पर टैक्स घटाइयै हर परिवार गी राहत दिती ऐ। तैयार ते संरक्षित सब्जिएं पर जीएसटी 12 प्रतिशत थमां घटाइयै 5 प्रतिशत करी दिती ऐ। इस्सै चाल्ली डब्बाबंद फल उत्पाद पर बी हून छड़ी 5 प्रतिशत जीएसटी लगग। इनें सुधारें दी मदद कन्ने ना छड़ा खुराक गी डब्बा बंद करने आहले उद्योगें गी बढ़ावा थहोग, सगुआं इंदा निर्यात बधग ते कन्ने सतदार खुराक वाजब भाएं पर उपलब्ध होग। लोकें सरकार दी इस कार्रवाई दी सराहना करदे होई आभार प्रगट कीता ऐ ते आखेआ ऐ जे इन्दे नै घरें

दे खर्चे घट्ट होडन ते हर कुसै गी राहत पुज्जग। लोकें दा मनना ऐ जे इन्दे सुधारें कन्नै महिलाएं, न्याणें ते बुजुर्गें गी बी बेहतर खुराक सखल्ले थोग।

<><><><><><>

Exhibition-Criminal Laws

जम्मू दे गुलशन ग्राउंड च नमे आपराधिक कन्नूनें बारै त्रै दिनें दी बड्डी नमैश अज्ज सम्पन्न होई गेई जेदा सरिस्ता जम्मू-कश्मीर पुलसै दे जम्मू अपराध शाखा दे आर्थिक अपराध सरबन्धी सीगे आसेआ कीता गेदा हा। गृह मंत्रालय दे दिशा-निर्देशों पर आयोजन इक त्रै रोजा प्रदर्शनी दा मकसद आम जनता गी नमे आपराधिक कन्नूनें आहली बवस्था तैहत इस चाल्ली दे अपराधें दे बारै च जागरूक बनाना हा तां जे हर कोई नेह कन्नूनें च होए दे बदलाव दे बारै च जान्नी ते समझी सकै। गृह विभाग च सरकार दे विशेष सचिव रंजीत सिंह, समापन समारोह च शामिल होए। इस बारै गल्ल करदे होई जम्मू-कश्मीर गृह विभाग च विशेष सचिव रंजीत सिंह होरें आखेआ।

<><><><><><>

Asia Cup

मर्दे दी टी-20 एशिया कप क्रिकेट टूर्नामेंट च भारत दा मुकाबला दुबई क्रिकेट स्टेडियम बंगलादेश कन्नै होग। एह मैच भारतीय समें मताबक रातीं 8 बजे नै शुरू होने आला ऐ। उआं कल संज्ना यू.ए.ई दे अब्बूधाबी दे शेख जायद स्टेडियम च आयोजित सुपर-4 मुकाबले च पाकिस्तान नै श्रीलंका गी 5 विकेटें कन्नै हराया। अज्ज दे मैच दे विजेता फाइनल च अपनी थाह पक्की करी लैग। दवें टीमें अपने शुरूआती मैच जिते दे न। भारत नै पाकिस्तान गी 2 मुकाबलें च हराए दा ऐ ते बांगलादेश नै श्रीलंका गी श्रीलंका खिलाफ मुकलबा जिते दा ऐ।

<><><><><><>

Weather

मौसम विभाग नै औंदी 3 अक्तूबर तगर जम्मू-कश्मीर च मौसम दे खुश्क रौहने दी पेशगोई कीती ऐ। श्रीनगर मौसम विभाग दे डरैक्टर डॉ. मुख्तार अहमद होरें आखेआ ऐ जे अगले 7 थमां 10 दिनें तगर मौसम च कोई बदलाव नेई होग। उनें आखेआ।

<><><><><><>